

Algúns descoñecidos veciños subacuáticos

Gonzalo Pérez Barreiro



Bueu é unha vila de carácter basicamente mariñeiro na que, polo seu tamaño e distribución, a maioría das persoas que a habitan coñécense directamente ou a través de referencias familiares ou de amizades. Indo un paso máis aló, atévome a considerar que mesmo se coñece á maioría dos animais domésticos de compañía, principalmente cans, ao seren vistos en compañía dos seus donos durante os seus paseos diarios. Igualmente son coñecidos os animais salvaxes da contorna, dando por feito que existan desde formigas, ratos e cascudas ata mouchos, serpes e pombas entre moitos outros.

De igual maneira, se nos centramos no mar, sabemos que nel habitan polbos, ourizos, estrelas, toda clase de peixes e unha infinidade doutros seres aos que todos somos capaces de poñerlles nome. Pero estou seguro de que a maioría descoñece a existencia dun grupo moi concreto de animais, que pasan desapercibidos polo seu pequeno tamaño e a súa

localización nos fondos, a pesar de dispor dunha gama de cores e formas totalmente espectaculares que os fai pareceren artificiais. Refírome aos nudibrancos.

Como o nome indica, son seres que teñen as súas “branquias espidas”, polo xeral dun tamaño que varía desde os 2 ou 3 milímetros ata os 8 ou 10 centí-



Parella de Babakinas



Polycera quadrilineata composta

metros (excepcionalmente algo mais) e que son un dos “santos griaís” dos fotógrafos submarinos. En augas de Galicia hai documentada a presenza de máis de 200 especies distintas (si, liches ben, máis de 200), e podemos equiparalos ás bolboretas ou ás orquídeas en canto a variedade e espectacularidade de formas e cores.



Coas súas cores advirten aos seus posibles depredadores de que non é boa idea comerllos (adoitan ser velenosos ou cando menos irritantes), e pola súa forma de desprazarse e a súa constitución poderíamos dicir que son as babosas do mar, aínda que infinitamente máis espectaculares.



Persoalmente, en augas de Bueu teño documentadas máis de 50 especies, e cada vez que me mergullo co Club de Mergullo Ons vou en busca de novos descubrimentos que aumenten o meu arquivo persoal, de forma similar á procura dos pokémon no mundo virtual.



Felimida purpúrea

Acompaño este pequeno texto con algunhas fotografías tomadas nestas augas, de forma que poidades ter unha idea do que tento describir.



Janolus christatus



Cadina

Se teño ocasión, en posteriores edicións irei presentando outros veciños descoñecidos que temos ao noso alcance cada vez que nos decidimos a entrar no seu mundo submarino.